


集異門足論

才五

三百五十七
同五

50296



阿毗達磨集異門足論卷第五

同

尊者舍利子說

三藏法師

玄奘奉

詔譯

三法品第四之三

三受者一樂受二苦受三不苦不樂受樂受云何答順樂受觸所生身樂心樂平等受受所攝是謂樂受復云修初第二第三靜慮時

順樂受觸所生身樂心樂平等受受謂樂受苦受云何答順苦受觸所生身苦心苦不平等受受所攝是謂苦受不苦不樂受云何答順不苦不樂受觸所生身捨心捨非平等非不平等受所攝是謂不苦不樂受如世尊說



具念定正知

諸佛真弟子

能正知諸受

令貪等不生

於諸受及道

俱令漸次滅

苾芻受盡故

無影般涅槃

三苦性者一苦苦性二壞苦性三行苦性苦

苦性云何答欲界諸行由苦苦故苦壞苦性

云何答色界諸行由壞苦故苦行苦性云何

答無色界諸行由行苦故苦復次不可意諸

行由苦苦故苦可意諸行由壞苦故苦順捨

諸行由行苦故苦復次若諸苦受若彼相應

法若彼俱有法若從彼生若彼種類不可愛

異熟果由苦苦故苦苦若諸樂受若彼相應法

若彼俱有法若從彼生若彼種類可愛異熟

果由壞苦故。苦若不苦，不樂受。若彼相應法，
若彼俱有法。若從彼生，若彼種類，非可愛，非
不可愛，異熟果。由行苦故，苦復次苦。苦性云
何？答：諸身所有，由苦苦故，苦所以者，何依身
生起？老病死等種種苦故。壞苦性云何？答：如
世尊說：可意朋友，可意眷屬，可意境界。若變
壞時，若遭毀謗，凌憊等時，發生愁歎憂苦悲
惱。彼於今時，由壞苦故，苦行苦性云何？答：除
苦苦性，及壞苦性，諸餘有漏行，由行苦故，苦
三慢類者：一我勝慢類，二我等慢類，三我劣
慢類。我勝慢類云何？答：如有一類，作是念言
我之種族形色，作業工巧，財位壽量力等，或

揔或別皆勝於彼由此起慢已慢當慢心高
舉心恃憍是謂我勝慢類我等慢類云何荅
如有一類作是念言我之種族形色作業工
巧財位壽量力等或揔或別皆等於彼由別
因緣而起於慢已慢當慢心高舉心恃憍是
謂我等慢類我劣慢類云何荅如有一類作
是念言我之種族形色作業工巧財位壽量
力等或揔或別皆劣於彼由別因緣而起於
慢已慢當慢心高舉心恃憍是謂我劣慢類
第四盟柁南曰

四三法有十

謂火福欲樂

及慧根眼伏

六一火慧二

有三火三福業事三欲生三樂生三慧三根
三眼三伏火慧各二餘二八各一

初三火者一貪火二瞋火三癡火貪火云何
荅謂於欲境諸貪等貪執藏防護堅著愛樂
迷悶耽嗜徧耽嗜內縛欲求耽酒苦集貪類
貪生揔名爲貪由此貪愛所蔽伏者發生種
種身熱心熱身心俱熱身燒心燒身心俱燒
身惱心惱身心俱惱又由貪愛纏爲緣故長
夜領受不可愛不可樂不可欣不可意異熟
果是謂貪火瞋火云何荅謂於有情欲爲損
害內懷栽杌欲爲擾惱已瞋當瞋現瞋樂爲
過患極爲過患意極忿恚於諸有情各相違

戾欲爲過患已爲過患當爲過患現爲過患
揔名爲瞋由此瞋恚所蔽伏者發生種種身
熱心熱身心俱熱身燒心燒身心俱燒身惱
心惱身心俱惱又由瞋恚纏爲緣故長夜領
受不可愛不可樂不可欣不可意異熟果是
謂瞋火癡火云何荅謂於前際無知後際無
知前後際無知廣說乃至癡類癡生很類很
生揔名爲癡由此愚癡所蔽伏者發生種種
身熱心熱身心俱熱身燒心燒身心俱燒身
惱心惱身心俱惱又由愚癡纏爲緣故長夜
領受不可愛不可樂不可欣不可意異熟果
是謂癡火如世尊說

諸有愚夫類

貪瞋癡火燒

如次耽欲境

害生憎聖法

於三毒熾火

若不如實知

便耽著有身

不能趣寂滅

由斯履邪路

墮三惡趣中

受劇苦輪迴

不解脫魔縛

正等覺弟子

晝夜常精進

以穢想慈悲

如次滅三火

從斯入聖道

降伏諸魔軍

證得二涅槃

清涼無取漏

後三火者一應奉事火二應給施火三應供

養火應奉事火云何答父母是子所應奉事

如世尊為高直身形婆羅門說云何名為應

奉事火謂世父母應受其子種種樂具隨處

隨時無倒奉事云何其子以諸樂具隨處隨

時無倒奉事應奉事火謂族姓子以精進力及手足力若汗血力如法所得財物樂具隨處隨時無倒奉事供養父母何故名爲應奉事火謂族姓子從彼而生由彼長養乃得成立是故父母諸佛說爲應奉事火應給施火云何荅妻子奴婢作使親友是其家主所應給施如世尊爲高直身形婆羅門說云何名爲應給施火謂世妻子奴婢作使及諸親友應受家主種種樂具隨處隨時無倒給施云何家主以諸樂具隨處隨時無倒給施應給施火謂族姓子以精進力及手足力若汗血力如法所得財物樂具隨處隨時無倒給施

妻子奴婢作使親友何故名爲應給施火謂
族姓子如法居家其妻子等無倒承事如教
爲作所應作業令無匱乏速得成辦是故妻
子奴婢作使及諸親友諸佛說爲應給施火
應供養火云何荅真沙門婆羅門是謂施主
所應供養如世尊爲高直身形婆羅門說云
何名爲應供養火謂沙門婆羅門若已離貪
或復修行調伏貪行若已離瞋或復修行調
伏瞋行若已離癡或復修行調伏癡行如是
沙門及婆羅門應受施主種種樂具隨處隨
時無倒供養云何施主以諸樂具隨處隨時
無倒供養應供養火謂族姓子以精進力及

手足力若汗血力如法所得財物樂具隨處
隨時無倒供養如前所說諸沙門婆羅門何
故名爲應供養火謂族姓子供養阿羅漢及
諸有學者彼是世間真福田故能令施主於
中樹福感得最勝此世他世富樂異熟及解
脫果是故真沙門及真婆羅門諸佛說爲應
供養火餘世間火非應奉事給施供養彼不
能令諸有情類得勝果故如世尊說

智者能如法

祭事前三火

生有樂世間

證無苦解脫

三福業事者一施類福業事二戒類福業事
三修類福業事施類福業事者云何施類云

何福云何業云何事而說施類福業事耶荅
施類者謂施主布施諸沙門婆羅門貧窮苦
行道行乞者飲食湯藥衣服華鬘塗散等香
房舍卧具燈燭等物是名施類復次或由身
布施謂或施身或施身業或施所捨物或由
語布施謂或施語或施語業或施所捨物或
由意布施謂或施意或施意業或施捨心是
名施類福者謂施俱行身律儀語律儀命清
淨是名福業者謂施俱行諸思等思現等思
已思思類作心意業是名業事者謂施主受
者及所施物是名事此中施類名施類亦名
福亦名業亦名事此中福名為福亦名業亦

名事亦名施類此中業名爲業亦名事亦名
施類亦名福此中事唯名事戒類福業事者
云何戒類云何福云何業云何事而說戒類
福業事耶答戒類者謂離害生命離不與取
離欲邪行離虛妄語離飲宰羅迷麗耶末陀
放逸處酒是名戒類福者謂戒俱行身律儀
語律儀命清淨是名福業者謂戒俱行諸思
等思現等思已思思類作心意業是名業事
者謂若防若上若遮若離害生命事是離害
生命事若防若止若遮若離不與取事是離
不與取事若防若止若遮若離欲邪行事是
離欲邪行事若防若止若遮若離虛妄語事

是離虛妄語事若防若止若遮若離飲宰羅
迷麗耶末陀放逸處酒事是離飲諸酒事是
名事此中戒類名爲戒類亦名福亦名業亦
名事此中福名爲福亦名業亦名事亦名戒
類此中業名爲業亦名事亦名戒類亦名福
此中事名爲事亦名戒類亦名福亦名業修
類福業事者云何修類云何福云何業云何
事而說修類福業事耶荅修類者謂慈悲喜
捨四無量是名修類福者謂無量俱行身律
儀語律儀命清淨是名福業者謂無量俱行
諸思等思現等思已思思類作心意業是名
業事者謂所緣事緣彼而起四無量是名事

此中修類名爲修類亦名福亦名業亦名事
此中福名爲福亦名業亦名事亦名修類此
中業名爲業亦名事亦名修類亦名福此中
事唯名事如世尊說

智者能依法

勤學施戒修

生無苦世間

受三種樂果

三欲生者有諸有情樂受現前諸妙欲境彼
於現前諸妙欲境富貴自在轉謂人全天一
分是第一欲生有諸有情樂受自化諸妙欲
境彼於自化諸妙欲境富貴自在轉謂樂變
化天是第二欲生有諸有情樂受他化諸妙
欲境彼於他化諸妙欲境富貴自在轉謂他

化自在天是第三欲生此中有諸有情者謂
諸有情諦義勝義不可得不可近得非有非
現有但於諸蘊界處由想等想假言說轉謂
爲有情那羅意生儒童命者生者養者士夫
補特伽羅由斯故說有諸有情樂受現前諸
妙欲境者謂彼有情恒樂受用蔽護積集委
寄安置隨本所生現前欲境彼於現前諸妙
欲境富貴自在轉者謂彼有情於所受用蔽
護積集委寄安置隨本所生現前欲境有勢
力得自在隨意受用謂人全者顯一切人天
一分者顯欲界下四天是第一者謂隨筭數
漸次順次相續次第此居第一欲生者謂此

於欲界生復次有諸有情者謂諸有情諦義
勝義不可得廣說如前樂受自化諸妙欲境
者謂樂變化天造作增長如是類業彼由此
業隨所受樂化作種種男女等事而自娛樂
謂若天女化作天男而自娛樂若諸天男化
作天女而自娛樂彼於自化諸妙欲境富貴
自在轉者謂樂變化天造作增上如是類業
彼由此業隨所受樂化作種種男女等事彼
於此事有勢力得自在隨意受用謂樂變化
天者顯一切樂變化天是第二者謂隨筭數
漸次順次相續次第此居第二欲生者謂此
於欲界生復次有諸有情者謂諸有情諦義

勝義不可得廣說如前樂受他化諸妙欲境者謂他化自在天造作增長如是類業彼由此業與諸他化自在天雖同一類身同一趣同一生同一進趣而有高下勝劣差別諸下劣天子化作種種色聲香味觸諸妙欲境令高勝天子於中受用彼於他化諸妙欲境富貴自在轉者謂他化自在天造作增長如是類業彼由此業隨所愛樂令他下劣天子化作種種色聲香味觸諸妙欲境彼高勝天子於此欲境有勢力得自在隨意受用譬如梵天雖同一類同一趣同一生同一進趣而有高下勝劣差別謂梵衆天下劣梵輔天高勝

梵輔天下劣大梵天高勝他化自在天亦復如是造作增長如是類業彼由此業廣說如前謂他化自在天者顯一切他化自在天是第三者謂隨筭數漸次順次相續次第此居第三欲生者謂此於欲界生

三樂生者有諸有情即如是身離生喜樂之所滋潤徧滋潤適悅徧適悅充滿徧充滿滋潤乃至得充滿已安樂而住謂梵衆天是第一樂生有諸有情即如是身定生喜樂之所滋潤徧滋潤適悅徧適悅充滿徧充滿滋潤乃至徧充滿已安樂而住謂極光淨天是第二樂生有諸有情即如是身離喜之樂之所

滋潤徧滋潤適悅徧適悅充滿徧充滿滋潤
乃至徧充滿已安樂而住謂徧淨天是第三
樂生此中有諸有情者謂諸有情諦義勝義
不可得不可近得非有非現有但於諸蘊界
處由想等想假言說轉謂為有情那羅意生
儒童命者生者養者士夫補特伽羅由斯故
說有諸有情即如是身者身名為身身業亦
名身身根亦名身五有色根亦名身四大種
聚亦名身今此義中意說四大種聚身故說
即如是身離生喜樂者謂初靜慮中所可得
樂平等受受所攝是名離生喜樂之所滋潤
徧滋潤適悅徧適悅充滿徧充滿者謂梵衆

天於此離生喜樂隨欲而得無艱無難即此
離生喜樂起等起生等生聚集出現能令如
是四大種聚身滋潤徧滋潤適悅徧適悅充
滿徧充滿滋潤乃至徧充滿已安樂住者謂
彼今時由離生喜樂身心無苦惱安樂而住
如世尊於分別生記經中說苾芻當知如修
定者從此處沒生梵衆天數數現受離生喜
樂彼先住此入初靜慮亦數現受離生喜樂
彼先後所受離生喜樂無異無差別依定等
故謂先此間於初靜慮若習若修若多所作
後方生彼梵衆天故二所受離生喜樂品類
相似謂梵衆天者顯初靜慮梵衆等天是第

一者謂隨筭數漸次順次相續次第。此居第一樂生者謂此生處長時受安隱樂離苦樂樂受樂故名樂生。復次有諸有情者謂諸有情諦義勝義不可得廣說如前。即是身者身名爲身乃至廣說定生喜樂者謂第二靜慮中所可得樂平等受所攝是名定生喜樂之所滋潤徧滋潤適悅徧適悅充滿徧充滿者謂極光淨天於此定生喜樂隨欲而得無艱無難即此定生喜樂起等起生等生聚集出現能令如是四大種聚身滋潤徧滋潤適悅徧適悅充滿徧充滿滋潤乃至徧充滿已安樂住者謂彼尔時由定生喜樂身心無

苦惱安樂而住如世尊於分別生記經中說
苾芻當知如修定者從此處沒生極光淨天
數數現受定生喜樂彼先住此入第二靜慮
亦數現受定生喜樂彼先後所受定生喜樂
無異無差別依定等故謂生此間於第二靜
慮若習若修若多所作後方生彼極光淨天
故二所受定生喜樂品類相似謂極光淨天
者顯第二靜慮極光淨等天是第二者謂隨
筭數漸次順次相續次第此居第二樂生者
謂此生處長時受安隱樂離苦樂樂受樂故
名樂生復次有諸有情者謂諸有情諦義勝
義不可得廣說如前即如是身者身名爲身

乃至廣說離喜之樂者謂第三靜慮中所可得樂平等受受所攝是名離喜之樂之所滋潤徧滋潤適悅徧適悅充滿徧充滿者謂徧淨天於此離喜之樂隨欲而得無艱無難即此離喜之樂起等起生等生聚集出現能令如是四大種聚身滋潤徧滋潤適悅徧適悅充滿徧充滿滋潤乃至徧充滿已安樂住者謂彼今時由離喜之樂身心無苦惱安樂而住如世尊於分別生記經中說苾芻當知如修定者從此處沒生徧淨天數數現受離喜之樂彼先住此入第三靜慮亦數現受離喜之樂彼先後所受離喜之樂無異無差別依

定等故謂先此間於第三靜慮若習若修若
多所作後方生彼徧淨天故二所受離喜之
樂品類相似謂徧淨天者顯第三靜慮徧淨
等天是第二者謂隨筭數漸次順次相續次
第此居第三樂生者謂此生處長時受安隱
樂離苦樂樂受樂故名樂生

初三慧者一聞所成慧二思所成慧三修所
成慧聞所成慧云何答因聞依聞由聞建立
於彼彼處有勢力得自在正徧通達其事如
何如有苾芻或受持素旦纜或受持毗奈耶
或受持阿毗達磨或聞親教師說或聞軌範
師說或聞展轉傳授藏說或聞隨一如理者

說是名為聞。因此聞依此。聞由此聞建立。故此於彼彼處有勢力得自在。正徧通達是名聞所成慧。思所成慧云何。答因思依思由思建立於彼彼處有勢力得自在。正徧通達其事如何。謂如有一方便善巧自勤修習諸離染道。由此所修離染道。故離欲惡不善法。有尋有伺。離生喜樂。入初靜慮。具足。

住廣說乃至入第四靜慮具足住是名爲修
因此修依此修由此修建立故於彼彼處有
勢力得自在正徧通達是名修所成慧有作
是說如此亦是思所成慧所以者何唯依佛
法不共所修乃可名爲修所成慧今此義中
依諸等引所起寂靜慧皆名修所成慧

後三慧者一學慧二無學慧三非學非無學
慧學慧云何荅學作意相應於法簡擇極簡
擇最極簡擇解了等了近了徧了機點通達
審察聰叡覺明慧行毗鉢舍那是名學慧無
學慧云何荅無學作意相應作法簡擇廣說
乃至毗鉢舍那是名無學慧非學非無學慧

云何荅有漏作意相應於法簡擇廣說乃至毗鉢舍那是名非學非無學慧

三根者一未知當知根二已知根三具知根

如法蘊論廣說其相如世尊說

學者學諸根

恒隨正直道

常委勤精進

守護於自心

初慧根無間

生第二慧根

若第三慧根

解脫位方有

不動解脫位

諸有結永盡

無漏根圓滿

樂止息諸根

將入永寂滅

任持最後身

降伏諸魔軍

證畢竟常樂

三眼者一肉眼二天眼三聖慧眼肉眼云何

荅雜骨肉血淨四大種所造眼界眼處眼根

是名肉眼。天眼云何？答：不雜骨肉血極淨。四大種所造眼界。眼處眼根是名天眼。聖慧眼云何？答：諸有學慧及無學慧，并一切善非學非無學慧，是名聖慧眼。如世尊說：

肉眼最為劣

天眼名次上

聖慧眼最勝

有三種差別

諸世間善慧

能順趣決擇

學無學正知

盡生老病死

大覺天人中

名稱最高遠

亦由慧速證

妙覺莊嚴身

三仗者：一聞仗，二離仗，三慧仗。聞仗云何？答：

多聞聞持聞積集者。若所說法初中後善文義巧妙純一圓滿清白梵行於如是法具足多聞憶持所聞言教純熟專意觀察所聞言

教於諸法義見善通達是名爲聞因此聞依
此聞由此聞建立故能斷不善法能修諸善
法此名爲聞亦名爲仗亦名聞仗故名聞仗
離仗云何荅離欲惡不善法有尋有伺離生
喜樂入初靜慮具足住廣說乃至入第四靜
慮具足住是名爲離因此離依此離由此離
建立故能斷不善法能修諸善法此名爲離
亦名爲仗亦名離仗故名離仗慧仗云何荅
如實了知此是苦聖諦此是苦集聖諦此是
苦滅聖諦此是趣苦滅道聖諦是名爲慧因
此慧依此慧由此慧建立故能斷不善法能
修諸善法此名爲慧亦名爲仗亦名慧仗故

名慧仗如世尊說

聞仗最為劣

離仗名次上

慧仗最為勝

精進力具足

具念樂靜定

知世間生滅

於一切解脫

至世邊彼岸

第五喞栴南曰

五三法有十

謂學修住定

導淨默增上

無上明各三

有三學三修三住三定三示導三清淨三寂

默三增上三無上三明

三學者一增上戒學二增上心學三增上慧

學增上戒學云何答安住具戒守護別解脫

律儀軌則所行悉皆具足於微小罪見大怖

畏受學學處是名增上戒學增上心學云何
荅離欲惡不善法有尋有伺離生喜樂入初
靜慮具足住廣說乃至入第四靜慮具足住
是名增上心學增上慧學云何荅如實了知
此是苦聖諦此是苦集聖諦此是苦滅聖諦
此是趣苦滅道聖諦是名增上慧學如世尊說
苾芻具三學 樂修如理行 增上戒心慧
恒相續現行 具精進勢力 及明盛靜慮
常守護諸根 勤行不放逸 如晝夜亦然
如夜晝亦尔 如前後亦尔 如後前亦然
如下上亦然 如上下亦尔 勝伏諸方所
由不放逸定 說此為學迹 不放逸而住

由能了能捨

故得心解脫

世說為等覺

雄猛至行邊

明行俱圓滿

恒住無忘失

命根不相續

愛盡解脫故

如燈火涅槃

究竟心解脫

三修者一修戒二修定三修慧修戒云何答

於諸善戒親近數習殷重無間勤修不捨是

名修戒修定云何答於諸善定親近數習殷

重無間勤修不捨是名修定修慧云何答於

諸善慧親近數習殷重無間勤修不捨是名

修慧如世尊說

善修戒定慧

至極究竟者

已永盡諸有

無垢亦無憂

於著得解脫

具利慧深定

超衆魔境界

徧照如日輪

說一切有部集異門足論卷第五

同

凌懣

上音陵

下劇

反奇

窳

反蘇沒

娛

音愚

